

pardon et faisoit chaut temps, requiert ce sus le nombre de III XX et X.

Une amende doit Besoz de ce qu'il at desmenti en jugement Narduin le Convert, Willemin li Pelletiers plege.

III XX VII

Cognehu at Huguenins Tavoillars que li pièce de terre et de prey que Perrins filz Landri li demande, qu'elle fust achetée en nom de Henri Tavoillart dun li estaz est escripts sus le nombre de III XX, mas il dist qu'elle fust achetée et payée de son propre argent sens pertie doudit Henri son frère et est adjornés dou prover protestant ledit Perrin que prove qu'il faice ne li nue.

Ce sont les proves que Endelons feme Perrin de chiés le Roy at faites encontre Estene fil Bertet dun li estaz est escripts sus le nombre de III XX :

Endelons, principalz jurée dist per son sairement que Estevenins filz Bertet la quittay de toutes ces chouses perme ce qu'elle prist le quars ou elle devait panrre le tiers et que aultre fois en fust contens entre lour et fust ce des XIII ans jusques à XII ans.

Jannez li Reschas des Champs, premiers tesmoins, jures dist per son sairement ansi comme lidite Endelon; requis dou temps, il dist qu'il n'en est avisés.

Li Grans Othenins, secons tesmoins jurez dist per son sairement que aultre fois plaiz fust entre ledit Estevenin et ladite Endelon et que conpromis fust fais sus luy que palle sus poinne de X livres et que lidis Estevenins quittay ladite Endelon de toutes chouses perme ce qu'elle et sa fille ne pristrent masques le quars où elle dovoit panrre let tiers et fust li mise faite sus lui que palle et sus Jannet le Reschat de per Endelon de la voluntey de Perrin son mari et de per ledit Estevenin et fust ce fait entre la Tous Sains et la saint Michiel des XI ans jusques à XIII ans.

Besençons li Pelletiers, tiers tesmoins jures dist per son sairement que de cex chouses que Estevenins demande, plaiz en fust aultre foyz et en furent mise sus le Reschat et le Grant Othenin ensi comme li Grans Othenins le dist perme ce que lidite Endelon et sa fille ne prisentent masques le quars où elles dovoient panrre le tiers.

Rapportey est per le juge qu'elle at bien provey, l'amende doit Estevenin filz Bertet, Estevenin niez au Juyf plege.

Ce sunt les proves que Viviens filz au Maistre at faites encontre Besot dun li plaiz est escrips sus le nombre de IIII XX et I :

Viviens, principalx, jures dist per son sairement que Besoz vendist à luy qui palle celle pièce de prey le jour de l'Ascension et at bien des X ans jusques à XII pour XXI livres et XX sous au vin et fust vendus ou cimistiere emprès la chappelle saint Nycholas et dist que quant il heust achetey qu'il en fust revestus de Gaudet.

Vauthiers, premiers tesmoins jureis dist per son sairement que Besoz vendist à Vivien celle pièce de prey entre la chappelle saint Nycholas et le gregnier au priour pour XXI livres et XX sous au vin le jour de l'Ascension et at bien X ans jusques à XII et en fust investus lidis Viviens per Gaudet le maire et dist qu'il y at le quars et l'achetay après ce que que Besoz le vendist.

Belins, secons tesmoins jures dist per son sairement en tout et per tout ansi comme lidis Vauthiers premiers sauf que tant qu'il dist que ce fust ou moix de l'Ascension. Requis se il y at riens dis que non.

Jaquez filz au Visaul, tiers tesmoins jures dist per son sairement que Besoz vendist celle pièce de prey à Vivien pour XXI livres de quoi on beust XX sous chiés Gaudet ou cimistiere ; requis en quel leu, il dist qu'il n'en dist plus masques tant comme on l'en avoit emformé, requist li ont qu'il juroit se il fust au vendaige, il dist qu'il ne jurray point, qu'il ni fust pas.

Willemins de Sus le Four, quars tesmoins jures dist per son sairement en tout et per tout ansi comme Vauthiers premiers tesmoins.

Li Cuidre fiz au Maistre, quins tesmoins jurez dist per son sairement en tout et per tout ansi comme Vauthiers premiers tesmoins ; requis après ce qu'il heust palley son tesmoignaige un poul se Jaquez filz au Visaul y fust, dist que oy et il se trove que ne fust.

Estevenins li Gendrez sixeimes tesmoins jureis dist per son sairement qu'il oist bien dire à Besot et à Vivien le vendaige de celle

pièce de prey que Besoz demande qu'il costay XXII livres et que Besoz dist qu'il l'avoit venduy audit Vivien.

Dist Besoz sus les tesmoins qu'il ne li doivent nure quar li frère en sunt tut participant et en est adjornés Besoz à l'assise tenue le macredi après l'Apparition dou prover ; mise fait escripte sus IIII XX et XIX.

Ce sunt les proves que Willemins filz Othenet fait encontre le Gros Estene dun li plaiz est escripts sus le nombre de IIII XX :

Willemins, principalx jures dist per son sairement que li terre séant en la Coste Girart que li Gros Estenes li demande, qu'elle est sue, demourée de per son perre comme ses droiz heritaiges et l'ont tenue qu'il que ses perres l'ont tenue XXXI an et plus sens entreroute et cil que de lour ont cause.

Perrins li Jays, premiers tesmoins jures dist per son sairement en tout et per tout ansi comme lidis Willemins principalx et que lidis Gros Estene ne heust onques terraigne ne possession.

Quartiers li Escuyers, secons tesmoins jures dist per son sairement que li pièce de terre est à Willemin fil Othenet demourée de per son perre et que lidis Willemins et ses perres et cil de cui il at cause l'ont tenue XXXI an et plus comme son droit heritaige.

Maillars, tiers tesmoins tiers tesmoins (sic) jures dist per son sairement en tout et per tout ansi comme Quartiers li Escuyers secons tesmoins.

Rapportey est qu'il at bien provée sentencion, l'amende doit li Gros Estenes.

Ce sunt les proves que Willemins filz Othenet at faites encontre le Gros Estenes dun li estaz est escripts sus le nombre de IIII XX et VI :

Willemins principalx jures dist per son sairement que li terre dun li Gros Estene at demandé le terraigne est sue, demourée de per son perre et que il que ses perres que cil que de lour ont cause l'ont tenue XXXI an et plus sens entreroute ne n'en fust onques li Gros Estenes en possession.

Perrins filz Landri la Perdue, premiers tesmoins jures dist per son sairement en tout et per tout ansi comme Willemins li principaulx et plus que il dist que se lidis Willemins la perdoit qu'il ne amenderoit jay riens et qu'il ni avoit part.

Quartiers li Escuyers, secons tesmoins jureys dist per son sairement

que li pièce de terre dun li Gros Estene demande le terraige est à Willemin fil Othenet et à cex que de luy et ses personiers ont cause et demourée de per son perre et l'ont tenue XXXI an et plus comme lour droit heritaige, ne n'en vist onques le Gros Estene avoir la posesion.

Willemins filz Landri la Perdue, tiers tesmoins jures dist per son sairement en tout et per tout ansi comme Quartiers li Escuyer secons tesmoins et plus qu'il dist que ses frères l'achetay au temps qu'il estoyent encor ensemble et qu'il la donnay à un suen parent cest adsavoir sa part et que se ses frères la perdoit qu'il ne amenderoit rirens ne n'en renderoit.

III XX VIII

Buenons de Chiés Regnaut dou Mont, quars tesmoins jures dist per son sairement en tout et per tout ansi comme Quartiers li Escuyers secons tesmoins et plus qu'il dist qu'li y at vehu panrre Willemin fil Othenet et cey qui de luy ont cause, le terraige ne vist onques le Gros Estene en possession ne panrre le terraige ; l'amende doit le Gros Estenes.

Provey at sousfisamment Willemins li Eschopars per luy, per le Vicorget, per Boichesflet et per Jaquet le Niez encontre Jannet le Reschat dun li estaz est escripts sus le nombre de III XX et V que lidite pièce de prey est sue et de son heritaige, demouré de per son perre et qu'il n'at fait chouse per quoy il la doit avoir perdue ; l'amende doit li Reschat, li Convers plege.

Ce sunt les proves que Pagans filz Ailleson at faites encontre Girart le Foul sus le nombre de III XX VI :

Pagans filz Ailleson, principalx jures dist per son sairement que li preys qu'il at demandé à Girart le Foul est suens et à Huguenin son frère de per Estevenete et Juhet lour femes filles dou Farnier et que, il ne lour femes, n'ont fait chouse per quoy elles le doivent perdre, ne onques d'ycelui prey ne heurent eschange ne encontre.

Othenins Lambers premiers tesmoins jures dist per son sairement en tout et per tout ansi comme lidis Pagans principalx.

Guyoz, dou Laic, secons tesmoins, en tout et per tout ansi comme Pagans principalx.

Willemins filz Ailleson, tiers tesmoins jures dist per son sairement que li preys que Pagans at demandey à Girart le Foul, que il est au dit Pagant, à Huguenin son frère et à lour femes filles dou Farnier et que il ne lour femes n'on fait chouse per quoi il la doie avoir perdue, ne onques n'en heust eschange ne encontre lidis Pagans ne ses frères qu'il saiche.

Provey at sousfisamment, l'amende doit Girars li Foux, li Convers plege.

Mise faite entre Willemin fil au Masson et Bertet fil à l'Escot, des Chasieres, dun li plaiz est escrips sus le nombre de IIII XX et III, sus Jannet fil Vauthier et le Jay fil Landri, sus poinne de X sous de tenir lour dit des quex lis sires auroit la moitié, plege Saliney pour le fil au Masson et Jannez li Escoz plege pour son frère et ont rapporté li arbitre que li terre se parte permey le quel rapport lidis Bertez at desdit et doit la poinne, rajorney sunt à l'assise en tel estat comme il estoient sus le nombre de IIII XX et III.

Jaquete feme au Rappat, de Mouretang, plaintis de la Cuidre fil Landriet, Jannés filz Girart, dou pont, plege pour l'un et pour l'autre, demande Jaquete une pièce de prey séant ou Prey Wyon desoulx le pont de la Roiche, entre le prey Esteveniet fil Perrin, de Mouretang, li quex preys est suens et de son heritaige ; jours d'apensement et de monstre au dymenge.

Commandé est à Perrenet de Mongesoye, qu'il gaigoit la plege que li feme Rubbi li mist pour resaisir le prey dun li estaz est escripz sus le nombre de IIII XX et I, pour ce qu'il heust journé di mener son garant ou de faire en son chief, le quel garant il ne amenay ne ne fist en son chief.

Cest jour fust avoyés Taillars, des Costes, de Thomas et Perrenet ses filz, emfans d'Estevenete la Rouse, premiere feme doudit Taillart, de la demande que Taillars fist à Jannin fil à la Berthote sus le nombre de IIII XX et I, liquel Thomas et Perrenet ont promis de tenir ce que seray

fait per ledit Taillart et respont li Berthote pour Jannin, son fil, qu'il aurat garant Lambelin son fil ou Vertin ou le Convert, tous ensemble ou chescun per luy ou il feray en son chief et at applegié li Berthote per le Convert que ses filz tenrray pour bon ce qu'il feray à ceste journée.

Ce sunt les proves que Rossignoux at faites encontre Estevenin le Gendret, escript sus le nombre de IIII XX et I :

Rossignoux, principalx jures dist per son sairement que celle ouictime partie de cloux que li Gendrés demande, qu'il la quittay à luy et à sa feme ou clostre en yvert heust un an.

Willemins filz Othenet premiers tesmoins jures dist per son sairement que li Gendrés quittay audit Rossignuel les sept parties dou dit cloux.

Perrins filz Othenet, secons tesmoins jures dist per son sairement que celle ouictime partie que li Gendrez demande, qu'il la quittay à Rossignuel et à sa feme ou clostre d'environ la Chandelouse heust un an; requis.

Quartiers li Escuyers, tiers tesmoins jures dist per son sairement qu'il fust ou clostre en yvert, heust un an après la Nativitey, où li Gendrés quittay celle ouictime partie que li Gendrés demande et dist que li feme Rossignuel ni fust pas à la quittance.

Estevenins li Chevaleras, quars tesmoins jures dist per son sairement qu'il fust ou leu où li Gendrez quittay les sept parties quant il respondit à la journée qu'il fust garans et plus n'en sceit.

Adjornée est à l'assise Sebillete feme Symont, de prover que li Rappalx et Jaquete sa feme li firent partie dou foinec et elle prist, dun li estaz est escripts sus le nombre de LXXII et ou en l'esdit de l'autre et jugement entier, Jaquez li Caigne plege pour Sebillete, Jannez gindres Jaquert plege pour le Rappat.

Une amende Estevenins filz Sagri de sanc fait à Huguenin son frère, Estevenins li Chevaleraz plege, IX sous quittes pour VI sous.

Provey at sousfisamment Regnaus genrres Perrin Petit que Fesoz l'at feruy et batuy et mis main a luy; l'amende doit Fesoz, Buenons plege, dun li estaz est escripts sus le nombre de IIII XX et V.

Mise s'est garans Secille, feme Quartier, pour Besençon fil Costerel, de la demande que li Cuiz li fist, sus le nombre de IIII XX et VII, et l'at applegié per Besençon fil Costerel ; mise faite sus Besençons fil Huguenete Chatoillon dou Laic, Perrin Dranoillon, et sus Othenin Barart sus poinne de X sous desquex li sires auroit la moitié, plege le Convert pour l'un et pour l'autre ; rapporté on li arbitres que li Cuiz en at XVI sous et il quitest la terre, lequel rapport li Cuiz n'at voluy tenir ; radjourney sunt à duy en XV jours.

IIII XX IX

Acort fait entre Perrel Rossignuel pour luy et pour ses hoirs d'une part, et Girardier pour luy et pour ses hoirs d'autre, dou descort mehut entre lour dous, dun li plaiz est escrips sus le nombre de LXXVIII, que li pièce de prey que Girardiens at demandée demoure audit Perrel toute quitte perme XL sous de monoye corsauble que lidis Perrex doit baillier audit Girardier et perme cex XL sous lidis Girardiens at quittey ledit prey audit Perrel et à ses hoirs et promis de garantir per son sairement corporelment donney et est fais cilz acors per Floret feme Guyet fil doudit Perrel, lequel acort lidis Perrex at louey et s'en est tenus à payés lidis Girardiés, l'amende doit Perrex, Willemin filz au Reschat plege.

Comme Perrins li Farniers at demandé au nom de Regnalde sa feme à Jehan fil Bertet frère de sa dite feme, plusiours heritaiges dun li estaz est escrips sus le nombre de IIII XX et VI, desquelles pièces de heritaige Estevenins filz Bertet frère doudit Jehan se mist garans d'une quantitey, rapportey est per le juge pour ce que lidis Jehans at monstré en jugement une lettre scellée dou scel de la court de Morteau es quelles est contenuy que lidis Farniers et Regnaulde sa feme quittèrent es dis Jehans et Estevenin tout l'eritaige et mobles que li pooient advenir de per perre en nom de son mariaige pour plusiours chouses contenues es dites lettres, que toute li demande entierement demoure

audit Jehan et à son frère ; l'amende doit li Farniers, Dranoillons plege.

Adjornés est li Farniers encontre Jehan et Estevenin emfans Bertet pour demander se lidis Farniers lour welt riens demander sus le prey dou Nasour qui est contenus en lettres qu'il ont dou Farnier, lequel prey lidis Farniers dist qu'il n'a point heu de lour et li lettre dist qu'il s'en tint à payés.

Li journée de Perrin Petit et de Vertin escripte sus le nombre de IIII XX jusques à l'assise.

Respont Buenons filz au Blanc à la demande que Bernars Voillez li fist sus le nombre de LIII qu'il en at fait passement et le monsterey et jugement entier, plege le Convert pour Bernart, Besençons filz Costerel plege pour l'autre, lequel passement Bernars li mist en noy ; adjornés en est Buenons à l'assise dou prover.

En desfaut li Reneviers et Willemins li Pelletiers ses frères, l'uns contre l'autre de journée assignée sus le nombre de IIII XX et VI ; faute pour ce que toutes les nouvelles demandes furent mises au dymenge après.

Acordé est entre Estevenin Brutillet et Willemin l'Eschopart de la demande que li Eschopars li fist sus le nombre de IIII XX et I, que li preys demoure audit Estevenin Brutillet et li at quittey li Eschopars à lui et à ses hoirs perme XXXVI sous monoie corsauble que li Eschopars enporte doudit Estevenin ; l'amende doit Estevenins et fust fais cilz acors per Willemin le Pelletier et Narduin le Convert, lequel acort li une et li aultre partie ont promis de tenir et jurey sus Saintes Euvangiles.

Acort fait entre Perrenin le Riotoux et le Farnier, rapportey per le Gindre, maire, dun li estaz est escripts sus le nombre de IIII XX et IIII sous que Farniers doit l'amende.

**Jours tenus à Morteau per davant monseignour Estene
et Girart le clerc, le dymenge après feste saint Luc Euvangeliste
l'an M CCC et XXX.**

Ce sunt les proves que Besençonins de la Rive at faites encontre Quarterot le Boschet, dun li estaz est escrips sus le nombre de IIII XX et VII. [*Laissé en blanc*]

Estevenins filz Boichin de la Grant Combe, plaintis de Estevenin Lardon, Huguenins li Rappaz plege pour Estevenin Boichin, Perrin Petis plege pour Lardon, demande Estevenins Boichins une pièce de terre séant est Combes, desoulz Bel Resgart, atignant de la vie, liquelle est sue et de son heritaige, demourey de per son perre et le monsterey, lui excepté fuers. Jours d'apensement et de monstre au dymenge après.

Narduins li Convers plaintis de Besençons le Pelletier, Robers filz Willeminet plege pour le Convert, jurey at Besençons de poursuivre le droit de la cour, demande liques que comme lidis Besençons se soit mis garans pour la feme Jaquet Belin et il meist plege ledit Convert de la garantie si comme il est contenuy ou pappier de la cour, de laquel plegerie lidis Convers pert ses gaiges, si requiert li Convers qu'il ses gaiges li delivroit; commandé est audit Besençon qu'il delivroit les gaiges doudit Convert, quar on trove per le pappier qu'il en mist ledit Convert en plege; à ce dist Besençons que ce pour quoy li gaige se perdoit n'est encor adjudgié et s'en tient au pappier.

Jours de garant à la Cuidre fil Landriet de la demande que Jaquete feme au Rappal li fist sus le nombre de IIII XX et VIII et nomme garant Estevenin Billon ou ses hoirs ou il feroit en son chief.

En tel estat li journée de l'Eschopart et de Jehan fil Juhan des Champs, escript sus le nombre de IIII XX V pour ce que lidis Jehans welt avoir garant et li Eschopars dit qu'il ne recevray point aultres que ledit Jehan pour ce que lidis Jehans li at quittée et lidis Jehans dit que on doit recevoir son garant; adjornay sunt à l'assise sus consoil veoir se li Eschopars doit recevoir le garant; rapportey ont que li Eschopars doit recevoir le garant doudit Jehan; en tel estat jusques sus le nombre de IIII XX et XIII.

III XX et X

Mis s'est garans Besençonns Vertins pour Jannin son frère de la demande que Taillars li fist sus le nombre de III XX et IX et at applegié la garantie per le Convert, et nomme secont garant Perrin le Farnier ou Estevenin le Gendret ou Estevenin le Chevalerat, tous ensemble ou chescun per luy ou il feray en son chief.

Ce sunt les proves que Sebillete at faites encontre Jaquete feme au Rappat dun li estaz est escrips sus le nombre de III XX et IX :

Sebillete, principalx juree dis per son sairement que dou foinec que li Rappaz li fist demande dou quel il dist qu'elle l'at dessasi, que lidis Rappalz et sa feme l'en firent la partie et quant elle prist que lidis Rappalz ne sa feme ne l'en alerent point au devant et l'en avoit III chirons et un anne.

Jannete de chief de Nocton, premiers tesmoins jures dis per son sairement en tout et per tout ensi comme li principalx.

Item, li Cuiche filz Juhann secons tesmoins jures dist per son sairement, qu'il estoit apoyés sus le pallez de son cloux et qu'il vist que li Rappalz et sa feme firent le partaige à Sebillete dou foinec de qu'il dient que ladite Sebillete les at dessasis et que li dite Sebillete et se partaiges pristrent de la partie et que lidis Rappalz ne sa feme ne alerent point au devant quant lidite Sebillete prist.

Adjorney en sunt à l'assise à rendre droit sus consoil de seignour ; rapportey est que lidite Sebillete at bien provey sentencion, l'amende doit li Rappalz LX sous quittes pour XI sous.

Estevenins Brutillés, plaintis de Perrin fil Quarterot, li Convers plege pour Estevenin, li Golaz plege pour Perrin, demande Brutillés que comme il prestet au clerc de Feir XX sous des quex XX sous lidis Perrins li fist plege, si requiert lidis Estevenins audti Perrin qu'il li bailloit gaiges desdis XX sous et se il welt noyer qu'il ne fust plege, il le proveray ; jours d'apensement.

Perrenete li Rose suers Perrin Banguerel, plaintis de Jannin la Cuiche, fil Juhannet, Robers filz Willeminet plege pour la Rose, li

Cuidre filz Landriet plege pour l'autre, demande li Rose, que comme elle et lidis Jannins fussent feme et maris, l'uns à l'autre, et il at conveny qu'il se alissent de partir à la cour de Besençon, que lidis Jannins li coventay VII livres d'estevenens masques elle l'alest quitter à la cour et li oster de la cour, si requier li Rose les dites VII livres et des coustenges jusques à X livres sauf le moins et welt monstrier li Rose que cex convenances furent telles comme elle les at demandées, se lidis Jannins les volait noyer ; jours d'apensement, li priour les at remis en cel point per davant l'official pour ce que ce est de mariaige et at quittée l'amende.

Perrins Dranoillons plaintis de Jaquete de chiés les Boschez, Willemins li Pelletiers plege pour l'un et pour l'autre, demande Dranoillons que comme lidite Jaquete heust plait à Henriet Caucheliet et elle heust fait à retenir le Convert de son consoil per Dranoillon et de baillier audit Convert au dit de Dranoillon que dou quel loyer elle mist plege Dranoillon, lidis Dranoillons at rapportey qu'elle baillat au Convert X sous des quex X sous li Convers at gaigié Dranoillon, si requiert Dranoillon que lidite Jaquet li faice à rendre ses gaiges ; acort fait perme V sous qu'elle rent à Dranoillon et il l'at quittée ; l'amende doit Jaquete, Willemins li Pelletiers plege.

Juhannés li Reschaz des Champs, plaintis de Ignelet la Courte, Willemins filz au Reschat plege pour son perre, jurey at Ignelés de poursuivre le droit de la cour, demande Juhannés que comme li Bailliz vendist à luy une pièce de prey séant en la Recullete, atignant de luy, douquel prey li Reschaz at demandé à garant ladite Ignelet et elle ne li at voluy porter garant, pour le desfault douquel garant lidis Reschaz at perdu le prey, si requiert li Reschaz qu'elle li rende son prey ou elle abandonnoit les biens de son mari ; à ce respont Igneles que de ce elle ne welt point plaidoyer et dit qu'elle retient tous ses biens à li, cex qui appartiennent à ly et tous les biens de son mari elle quitte et délivre à ses emfans et s'en est desvestue en la main de la justice pour investir sesdis emfans.

En desfault li Vaingnierres, adjornés per le priour sus le fait de l'eschoite au Farfait.